



**Uunga siunnersuut: Kalaallit Nunaata nunasiaataanerani ingerlatsinermit pissutsit pillugit qulaajaasoqarnissaanut, tamatumunngalu atatillugu Danmarkip NP nunasiaataajunnaarsitsinermit piumasagaataanik naammassinnissimanersoq suliassamik allaaserinnittoqarnissaanik Inatsisartunit akuersissutigineqartussatut aalajangiiffigisassatattut siunnersut**

(Nunanut Allanut, Inuussutissarsiornermut Niuernermullu Naalakkersuisoq)

(Siullermeerneqarnera)

Spiraalilersuisimaneq. Inatsisitigut ataataqanngitsut. Meeqqat misileraataasimasut. Danmarki piffissami kingullermi ulapissimaqaaq utoqqatserniarluni. Kisiannili soorlu, suliassanik nutaanik nammakkiisumik puttallartoqartuaannartoq.

Piffissanngorpoq, tamatsinnut paasissallugu, Danmarki nunasiaatiminut inussiarnersuusimanngitsaq, aammalu pisut tamarmik, ajunngitsusaaq pillugu iliornerusimanngitsut. Tamanna tunngavigalugu pilertortumik pisariaqarpoq paasiniassallugu, aamma suut toqqinnarneqarsimanersut nunasiaateqartut tungaanniit. Aatsaat suut tamarmik qaqqinneqareerpata paasiniarlugu aallartissinnaavugut, qanoq ingerlariaqqissinnaanerluta. Aatsaallu taamaaliorutta nunatut inuttullu naligiimmik suleqateqarnik aallartissinnaallutigu.

Uuminnga siunnersuuteqarnikkut Naalakkersuisut kissaatigaat ataatsimiititaliarsuarmik pilersitsinissani, Kalaallit Nunaata nunasiaataajunnaarnerani pisunik qulaajaasussamik. Apeqquterujussuuvoq tamanna naammannersoq. Demokraatit isumaqarput, suut tamaasa misissortariaqarigut ujaqqat ataasiakkaarlugit qulaajarlugit Kalaallit Nunaata nunasiaataajunnaarnerata misissuinnarneraniik.

Allatut oqaatigalugu, Demokraatit isumaqarput, piffissanngortoq, ataatsimiititaliarsuarmik pilersitsinissaq, nunasiaataasimanermik qaqqilerisussamik, suut tamarmik saqqummerniassammata. Tassanilu isumaqarpugut suut tamarmik. Allatut ajornartumik nunasiaataasimaneq naggataarutaasumik qulaartariaqarparput inunnullu pinerluttuliortoqarsimassappat qulaarlugu, danskit naalagaaffiata pisuussutigisimasai. Suna tamarmi saqqummissaaq. Imaanngilaq, tamatta Danmarkip nunasiaateqartutut inussiarnersutut isigineqarneranik, sunalu tamaat eqqortusaaq pillugu iliuuserineqarsimasutut uppertinneqartuassasugut.

Tassunga atatillugu aamma isumaqarpugut, tulluassasoq, danskit naalagaaffiata, ataatsimiititaliarsuup sulinera akilerpagu. Tamanna siunnersuutaavoq Naalakkersuisut siunnersuutaata akerlianik, taakkua siunnersuutigimmassuk, uagut Kalaallit Nunaanniittut, akilissagipput.

Taamaattumik Demokraatit siunnersuutigerusuppaat, ataatsimiititaliami suliassat allattorsimaffiannut ilanngunneqartussatut ukkatarineqassasoq, aningaasaleeriaaseq, tassani Danmark aningaasaliisussanngorlugu.



Taamatut oqaaseqaaserlugu siunnersuut ataatsimiititaliami susassaqtumi suliareqqinneqarnissaa innersuunneqarpoq.